

Directora di SMFA, Anne Witsenburg

Restauracion di forno di calki ta prome stap pa restaura Rancho



ORANJESTAD – Ayera pa directora di Stichting Monumentenfonds Aruba (SMFA), Anne Witsenburg tabata un 'dia masha special pa nos.' El anuncia cu den luna di september lo inicia cu e proyecto di restauracion di e forno di calki. Un monumento cu a bay atras y te hasta cu a yega di bira un habitat pa e adictonan cayehero.

E anuncio aki a conta cu presencia entre otro di representantenan di Unoca, Arubank, Stichting Rancho, Prins Bernhard Cultuurfonds Caribbean, Enseñansa pa Empleo Aruba, Museo Arkeologico. Witsenburg a gradici tur e colaboracion cu e partnernan aki a brinda pa finalmente e restauracion di e forno di calki lo por bira un realidad.

Directora di SMFA a indica cu nan ta consciente di e realidad cu e bario di Rancho tin su problemanan social, entre otro. Te hasta el a yega di confronta cuestionamento di algun hende cu a puntr'e: Dicon nan a cuminsa den Rancho e proyecto aki. Of si nan no tin miedo cu despues di e restauracion e proyecto por a bay atras. Witsenburg a bisa cu, sin duda, nan tin miedo di esey. Pero el a bisa cu nan a tuma e iniciativa pasobra 'si nos no ta haci nada, nada ta bay cambia tampoco.' E intencion ta cu e sosten di diferente instancia gubernamental y no gubernamental

lo por mehora henter e bario y no solamente e forno di calki. E ta spera cu esaki ta e prome step den e proceso di restaura un bon imagen di e bario historico di Rancho.

Financiamiento

E forno aki situa na Rancho y cu a wordo construi alrededor di 127 aña pasa ta un monumento tangibel di nos historia economico y industrial. Pero pa hopi aña –segun Directora di SMFA– nan deseo tabata pa cuminsa cu e restauracion aki.

SMFA ta un fundacion cu no ta ricibi subsidio y ta depende di entradanan di huur pa por mantene cada monumento. Debi na cu e obhetonan monumental manera e forno di calki no por huurman pa genera entrada, e ta haci e posibilidad pa crea fondonan pa restaura e mas dificil. Pero ayera nan por a anuncia cu nan ta asina leu cu a logra di haya e fondonan necesario pa por restaura e forno completamente.

E fundacion aki kier gradici Aruba Bank pa e gran aporte na e proyecto aki cu un donacion di 30 mil florin y tambe na VNO y Ministerio di OCW di Hulanda cu a pone fondonan disponibel pa asina por logra restaura e forno di calki den Rancho completamente.

Ehecucion

E proyecto lo wordo ehecuta

pa Parvenir Heritage Restoration & Maintenance Company Ltd. Nan ta un compania di Trinidad y Tobago cu experticio amplio riba restauracion di monumentonan na diferente paisnan den Caribe. Recientemente tabata na Aruba tambe caminda cu a haci e investigacionnan necesario pa locual ta e materialnan for di cual e forno di calki ta consisti pa asina por restaura esaki di e forma corecto. Ya cu no solamente SMFA tabata buscando fondo sino e conocimiento. E compania cu lo ehecuta e restauracion tin e conocimiento, y un aspecto importante ta, cu nan ta dispuesto pa comparti e conocimiento aki cu nos hendenan tambe.

E forno di calki aki cual ta un di e miho conserva den area di Caribe ta actualmente den

un mal estado. Algun luna pasa tambe e forno tabata den luz negativo pa un incidente cu a tuma luga akinan. Debi na esaki Stichting Monumentenfonds a dicidi di cera e forno su entrada, mientras cu ta sigui busca e fondonan pa por restaura esaki debidamente.

E restauracion tin un duracion di mas o menos dos luna. Nan ta bay cuminsa dia 24 di september y su duracion ta depende di e situacion. Ya caba nan a pidi un permiso na Oficina di Monumento pa cuminsa cu e trabou aki den e fecha indica caba pa cumpli cu tur regla envolvi, segun Witsenburg.

Fundacion Rancho

Unabes finalisa e idea ta pa Stichting Rancho por sigui

tene e historia di e forno aki bibo y educa e comunidad y bishitantenan tocante e forno di calki durante nan actividadnan y tourman. "Fundacion Rancho lo bay tin e yabi e forno di calki," segun Witsenburg. Asina nan kier sigur un bon futuro di e forno aki y SMFA lo keda mantene e monumento aki. Nan ta spera cu e restauracion di e forno por stimula mas desaroyo den e area y asina trece mas actividadnan y desaroyonan positivo pa e bario di Rancho.

Esaki tabata un deseo chungto tanto di SMFA como di fundacion Rancho pa hopi aña. Directora di SMFA a indica cu nan ta hopi contento cu aworaki nan tin hopi partner cu a haci e acontecimiento aki posibel.

